

IMF yakin prestasi Malaysia



» *Nikmati pertumbuhan ekonomi baik, rancak peringkat global*

Daripada Rupa Damodaran di Kuwait City
bhbiz@bh.com.my

*Dalam kes Malaysia, Zeti telah menjadi tonggak utama, **bijaksana dan pakar dalam bidang kewangan Islam.** Kami terhutang budi kepada beliau”*

Christine Lagarde,
Pengarah Urusan IMF

Pengarah Urusan Tabung Mata Wang Antarabangsa (IMF), Christine Lagarde berkata Malaysia dan beberapa negara Asia akan terus menikmati pertumbuhan ekonomi yang baik dan rancak, meskipun masih wujud risiko di peringkat global.

Dalam temubual eksklusif dengan akhbar *New Straits Times* di Kuwait City, Lagarde berkata, kelembapan ekonomi China dan pelbagai langkah peralihan yang diambilnya berserta harga komoditi yang rendah; permintaan global yang lemah dan peralihan dasar

kewangan oleh beberapa bank pusat utama, adalah antara risiko yang perlu dihadapi.

Namun begitu, beliau berkata, situasi itu juga membuka beberapa peluang.

“Asia secara umum, dan sudah tentu Malaysia, adalah antara negara di mana terdapat pertumbuhan yang munasabah dan rancak, yang mana hasilnya, dan, jika ada kestabilan politik dan persekitaran mesra perniagaan, aktiviti ekonomi, modal dan pelaburan, akan terus bergerak ke hadapan,” kata Lagarde.

Beliau berkata demikian dalam satu wawancara di luar acara Persidangan Kewangan Islam anjuran IMF dan Bank Negara Kuwait, yang bermula kelmarin.

Persidangan itu dihadiri oleh pembuat dasar peringkat tinggi, termasuk gabenor bank pusat dan menteri; pengawal selia; penetap standard konvensional dan Islam; eksekutif institusi kewangan sektor swasta dan awam terkemuka, dan ahli akademik. Gabenor Bank Negara Malaysia, Tan Sri Dr Zeti Akhtar Aziz adalah antara ahli panel pada persidangan itu.

Kewangan Islam, kata Lagarde, akan terus membangun dan berkembang memandangkan peranannya dalam menyediakan kestabilan dan leveraj yang rendah, dan keupayaannya dalam menyumbang kepada keterangkuman.

“Dalam kes Malaysia, Zeti telah menjadi tonggak utama, bijaksana dan pakar dalam bidang kewangan Islam. Kami terhutang budi kepada beliau,” katanya.

Ubah pandangan

Lagarde, bekas Menteri Kewangan Perancis, telah menerajui IMF sejak Julai 2011. Di bawah kepimpinan beliau, badan kewangan yang berpangkalan di Washington telah mengubah pandangan mengenai dasar terhadap kawalan modal.

Malaysia sebelum ini pernah dikritik oleh badan kewangan global itu apabila melaksanakan langkah kawalan modal ketika Krisis Kewangan Asia lewat 1990-an mencapai kemuncaknya.

“Sebagai contoh, apabila kawalan modal dilaksanakan, agak sukar untuk kita menamatkannya tanpa mencetuskan gangguan yang ketara,” katanya.